

四庫全書

集部



欽定四庫全書

集部

傅與礪詩集卷二

詳校官編修<sub>臣</sub>曹錫齡

中書<sub>臣</sub>劉源溥覆勘

總校官進士<sub>臣</sub>朱鈐

校對官學正<sub>臣</sub>翁樹棠

謄錄監生<sub>臣</sub>鄒世俊



欽定四庫全書

集部五

傅與礪詩文集

別集類五 元

提要

臣等謹案傅與礪詩文集二十卷元傅若金

撰若金字汝礪改字與礪江西新喻人幼力學為同郡范梈所知得其詩法虞集宋褰以異材薦之臺省館閣交稱無異辭佐使安南歸除廣州文學教授所著詩集有南征稿使



還新稿牛鐸音等編范虞諸人皆嘗為之序  
至正間其弟若川彙鈹之名曰清江集至明  
洪武中又刻其文集十一卷附錄一卷今詩  
文總為一編不知何時所併若金當元極盛  
之時親承宿老指授故其詩極有軌度而文  
亦和平雅正無棘吻蟄舌之音雖不能雄視  
詞壇然亦可以劇諸家之壘矣乾隆四十六  
年三月恭校上



總纂官臣紀昀臣陸錫熊臣孫士毅

總校官臣陸費墀







傅與礪詩集原序

孔子曰詩可以興可以觀可以羣可以怨朱氏釋曰興者感發志意觀者考見得失羣者和而不流怨者怨而不怒四者之事不同而其序宜有先後蓋見他日論詩禮樂則首曰興於詩詩者志之所之以其志感人之志者孰不足以有所感發哉然則興者豈非居先乎感人之道莫尚乎聲音入焉寂然泯然忽而歆起震奮動蕩淪浹入之深而化之敏者斯其效曷從而至哉古人云



聲音之道與政通夫聲者合天地之大氣軋乎物而生  
焉人聲之為言又其妙者則其因於一時盛衰之運發  
乎情性之正而形見乎辭者可覘已故曰治世之音安  
以樂其政和亂世之音怨以怒其政乖亡國之音哀以  
思其民困正得失動天地感鬼神莫近於詩夫詩道豈  
不博大哉要其歸主于詠歌感動而已斯義也司馬太  
史嘗聞之矣其言曰三百篇孔子皆弦歌之以合韶武  
雅頌之音夫既合之則當時存什一而去千百必其不



合者也深矣哉聲音之於政也聖人蓋取之矣新喻傅  
汝礪妙年工詩自古今體五七言皆厯厯馬力追古人  
有唯恐不及意間示余以所著編曰牛鐸音者讀之連  
日不厭聞其音而樂焉以為誠識所尚者因揭孔子之  
言詩徵以師說遂演繹以告之天厯二年四月一日范  
梈書于百丈山房

自至元建極大德承化天下文士乘興運迪往哲稍知  
復古至于詩去故常絕模擬高風遠韻純而不雜朔南



所共推而無異論者蓋得江西范德機焉德機沒後又得其鄉傳與礪焉德機盛矣余每讀與礪詩風格不殊神情俱詣如復見德機也然德機七言歌行勝與礪五言古律勝餘亦在伯仲之間而德機得盛名時年已過與礪使與礪及德機之年不知又當何如也天下文章莫難於詩劉會孟嘗序余族兄以直詩其言曰詩欲離欲近夫欲離欲近如水中月如鏡中花謂之真不可謂之非真亦不可謂之真即不可索謂之非真無復真者



惟德機與礪知之及此言之及此得之及此故余傾倒  
於二君焉而德機已矣余無能為矣庶幾猶有若與礪  
者他日足為學詩者之依歸也傳君初字汝礪余以天  
下同其姓字者衆也而易之曰與礪且以與與汝聲相  
近而便於改稱也元統三年七月辛巳朔揭傒斯序

詩之為學盛于漢魏者三曹七子至於諸謝齊矣唐人  
諸體之作與代終始而李杜為正宗子美論太白比之  
陰常侍庾開府鮑參軍極其風流之所至贊詠之意遠



矣淺淺者未足以知子美之所以為言也崔顥人品非雅馴太白見其黃鶴之篇自以為不可及至金陵而後彷彿焉其高懷慕尚如此誰謂其恃才傲物者乎求諸子美之所自謂盛稱文選而遠師蘇李詠歌之不足者王右丞孟浩然而所與者岑參高適實相羽翼後之學杜者多矣有能旁求其所以自致自得者乎是以前宋之盛亦有所不逮矣國初中州襲趙禮部元裕之之遺風宗尚眉山之體至涿郡盧公稍變其法始以詩名東



南宋季衰陋之氣亦已銷盡大德中文章輩出赫然鳴  
其治平集所與游者亦衆而貧寒相望發明斯事者則  
浦城楊仲弘江右范德機其人也楊之合作吳興趙公  
最先知之而德機之高古神妙諸君子未有不許之者  
也其後馬伯庸中丞用意深刻思致高遠亦自成一家  
觀者無間言而進士薩天錫者最長於情流麗清婉作  
者皆愛之而與前之諸公先後淪逝識者然後知其不  
可復得也德機之里人傅君與礪始以布衣至京師數



日之間詞章傳誦名勝之士無不倒屣而迎之以為上客臺省館閣以文名者稱之無異辭豈非以其風韻足以及於予所道諸君也哉予去國十年與礪自交趾使還以家貧親老授南海文學以歸嗟夫上林千樹豈無一枝以棲朝陽之羽哉而一官嶺海之不厭何也前數年諸公相知者多散出於外今明良一廷無所忌諱清澗之蒲海灣之水不足以久煩吟詠也必矣書其別後稿如此遲其北還則沉鬱頓挫從容溫厚有可起予者



何幸於餘生親見之哉作傳君與礪使還新稿序至正  
辛巳六月朔虞集伯生序



傅與礪詩集原序



欽定四庫全書

傳與礪詩集卷一

元 傅若金 撰

雜著

清安堂賦為思南李經歷作

夫何茲堂之靜佳谿谷繚以窈深泉歷除而細響樹交  
戶而繚陰世溷濁其汶汶咸役體而勞心愛順時以息  
養况顯敞而開襟无怡寂以禦煩諒君子之所廬感人  
生之長勤寒暑迭而相驅靡徇逸而非害孰忘患而恒



舒雖燕樂其何傷將不見之是圖庶依仁以自止潔吾  
穢而休居

敬業齋銘

惟茲生人均厥受命莫貴惟德莫尊惟性惟性如何萬  
善斯全君子于學思罔或愆惟德如何有積乃大君子  
于學思罔或懈詩書六藝進退灑掃近思弗遺上達有  
道夙興夜寐惟一乃心毋終食弗念毋閤室弗臨毋若  
彼教奕鴻鵠是惑譬茲服田力乃有得聖或罔念亦之



于狂孰曰子玩而聖之望敬之敬之遠實邇是基有節  
高山君子之儀

楚辭

楚漁父渡伍胥辭劍圖歌

江有阻兮路有歧時將迫兮來何遲子弗渡兮我心悲  
既渡子兮我何以劍為吁嗟行兮子毋我疑

黃鵠歌為劉母王氏作

黃鵠孤飛兮傷其匹儔生則同巢兮冥處何求死寧敢



愛兮孰將其雛山則有木兮隰有泉流翺飛何知兮惟  
飽以娛雖既羽翼兮將母來休毋詒母辱兮無使心憂  
寄題袁氏具慶堂

高堂兮巍巍華采衣兮芳菲瞻父母兮壽豈兄弟翁兮孔  
永一作懷出則仕兮自公入則養兮于堂之中昊天兮福  
爾錫眉壽兮未已夫人兮自有美子曰子歸兮將父與  
母

松澗引

并叙



松澗引者為林氏子晉作也晉父信卿本中山人客  
游衡陽樂其土遂居焉信卿死晉復築室其居之偏  
題曰松澗志其師之言也晉讀書善鼓琴元統初過  
家上冢因北至京師無何思其所居即慨然別故舊  
而去為作琴操三疊以贈之

澗之水兮泠泠上有松兮鬱青青嗟衡之居兮吾所寧  
胡淹留兮于帝京

澗之水兮揚清波上有松兮被女蘿我嘯兮我歌胡不



歸兮歲蹉跎

澗之水兮石楚楚上有松兮以風以雨築吾居兮其下誰  
將歸兮來吾與處

歸來三曲送李建中

月皎皎兮河漢長黃鵠在天兮招我以翱翔天氣涼兮  
夜未央援鳴琴兮託宮商商聲作兮風撼撼歸來兮天  
路杳渺不可以終極

月皎皎兮夜既寒白露下兮衣裳單南風一去兮何時



還援鳴琴兮曲再彈曲再彈兮天地為秋歸來兮清都  
之上不可以久留

月皎皎兮寒風作猿啾啾兮怨鳴鶴常恐秋遂為冬兮  
羣物以蕭索援鳴琴兮忽不樂忽不樂兮思吾土歸來  
兮山中之人不可以無父

芳草辭為杜若洲作

乘吾舟兮沅湘攬芳草兮朝行續衆美兮在予懷靈氛  
氛一作芬兮不能忘進予舟兮極浦將誰思兮遠者采杜



此下或有若字

兮葺蘅雜之兮宿莽羌姣服兮夷猶撫予帶兮宜脩綴何充兮佩幃荃何化兮為茅沅何為兮湯湯湘何為兮浩浩滿庭兮艾蕭衆紛進兮謂予不好望洞庭兮楚之野路漫漫兮夕愁予思君子兮孰後來結芳菲兮吾誰與

芝草歌

元化順兮日月昌至和蒸兮地發祥煜靈草兮賁齋房雲續續兮流玉英五色爛兮昭文章何所徵兮德芬



芳爰作歌兮著勿忘我君子兮思永臧

三言

滋之水奉題蘓氏滋溪書堂

滋之水濬且長流安極沛洋洋 滋之渌德所履續芬

芳萃厥美 滋之水澹而文豐迺積淑後昆 騰聲詩

播金石逾千祀永昭德

右四章章四句

五雜組



五雜組機上絲往復還城中兒不獲已生別離 五雜  
組園中花往復還將雛鴉不獲已貧去家

右二章章六句

四言

吉月美君子有德以壽也正月二十日壽揭學  
士

吉月之正日既陽止君子之生辰亦昌止天錫之德孔  
茂且植允善弗易君子之福 其善伊何如芬如芳如



芬如芳于前人勿忘其福伊何如山如岡眉壽以康時  
君子之慶慶維雲矣亦施于天華之蘊矣亦被于人  
君子有言有斐其文允也令人德音振振德音振振  
民之正矣百祿既臻神之聽矣飲我春酒壽考是承彼  
廈之安于木之憑曰有君子時邦家之興

右四章三章章八句一章章十句

東臯詩題長沙易君美存耕卷

瞻彼東臯每每其田孰其甸之維古之人其田每每



其稼繇繇日月以治厥有豐年 維田弗治維莠生之  
維心弗制維欲傾之 我思古人有播斯穫子孫其承  
庶茂厥德

右四章章四句

傳與礪詩集卷一



欽定四庫全書

傅與礪詩集卷二

元 傅若金 撰

五言古詩

雜詩五首

夭夭園中桃鬱鬱松上枝  
春陽發新榮貞脆誰能知  
一朝繁霜墜百卉各已萎  
青青乃自保不為時所移  
向非厄歲寒何以別竒姿

植蘭彌九畹種菊被三徑  
幽芳固殊姿馨德良可竝



蘭以為佩餐菊以資命  
賸言理蕪穢恒使枝葉淨  
蕪穢苦易侵枝葉苦不盛  
豈無桃與李貴此諧野性

窮巷有畸人夙夜勤古道  
敝衣適至骭蔬食恒不飽  
歌聲若金石顏色終歲好  
豈無當世念所趨惡佻巧  
美玉不足珍懷義以為寶

閒夜坐中庭素月流我懷  
鳴琴發玄思俗音難與諧  
微颺經前楹餘響正裴回  
欲歌南風曲聽者良已希  
願言薦清廟復感鳳來儀



異人言種石可以致雙璧千金受玄秘辛苦乃有獲溫  
其比君子韞櫝良愛惜青蠅易為汙恒恐傷厥德連城  
不願售思以置君側終歲無與言持之將安適

### 從軍行

征夫遠從軍徒旅無時還炎暉薄五嶺脩蛇橫道間朝  
食未遑飽夕寢焉能安駕舟涉廣川驅馬登崇山生別  
已不惜矧畏道路艱豈不懷室家王事有急難生當同  
富貴沒當同憂患



少年行

長衢

一作行

若平川輕車馳流波上有都人子明肌艷朝

霞芳塵揚遠風白日耀舞羅少年輕薄兒調笑相經過  
狎坐酌美酒日莫酣且歌千金罄一笑豪右焉能加時  
俗誇朱顏美女悅春華春華豈不好遲暮當如何

經采石

未明發蕪湖終飯次采石大江天同瀉巨浪山與敵松  
寒蒼蚪姿厓古老鐵色其傍有仙冢云是李太白生為



長庚精沒與大塊息因思開元中出入蒙帝澤御羹白  
瑤杯宮硯青玉滴恩榮日深重意氣何赫奕酣歌泰華  
小豪飲渤澥窄頗聞宮中怒遂有天上謫殷亂微子行  
楚昏屈平斥嗟哉唐家帝同姓逝安適何年為茲遊千  
載但故迹騎鯨信縹緲捉月詎昏惑得非厭塵羈無乃  
達寄客翻然委之去富貴何足惜杜陵平生友夢寐頻  
見憶白骨焉所求青山亦岑寂相去嗟已遠令人心悲  
塞舉酒欲酌之帆去招不得



晚憩

朝濟黃河流莫馳長路塵路長無時已河險難具陳高  
歌激層霄緬懷古之人剡木以為舟斲木以為輪自非  
制作聖何以通萬民飄飄遠遊子勿用歎苦辛

雜詩四首

皎皎素明月娟娟含令姿浮雲遽起滅圓景遂參差山  
川莽回互天地亦相疑焉知冥昧中明潔終不移弦望  
有恒運清光寧久虧



寸隙塵所投片言害所藏行徒惡蹶馬豈復惜其良榮  
辱具自致否通亦靡常脩正未蒙福為邪欲何望天道  
豈遠人撫心徒自傷

溫溫匣中玉什襲慎自持荆和始見賞舉國競慕之青  
蠅遽言集魚目亦相嗤昔為人所寶今為人所疵保終  
諒庶幾逝者已如斯

白璧易為毀常懼世所捐憂心日悄悄自好反成愆君  
子遠嫌疑胡為偷自安始知丘山累乃在半辭間盜金



信不疑攫塵惑子淵故心苟不易既往復何言

飛雪篇

北風厲中宵明晨散飛雪連翩素彩動泱泱玄陰結羣  
林互騰耀衆景紛變滅既增寒竹姿復宜青松節因高  
始成勢遇坎俄就缺東西衢路間來往昧深轍衆穢交  
凌踐幽光自娛悅皎皎恒易汙無為恃清潔

寒竹篇

寒竹依澗阿石生何磊磊滋息因厚地生成藉玄宰春



陽散華景枝葉被光彩及茲芳歲闌使我憂心痠遽悲  
凜節變但恐驚塵浼寒燠既異宜遲莫復何悔淇園蔭  
未息懈谷音猶在君子夙相好深懷邈雲海竹性諒靡  
遷人心懼中改願言卒封植勿使傷樵采

梅花曲

素芳何婉婉皎服耀江湄美人慕佳植託根乃在茲朔  
風振嚴冬孤花難自持流塵復浩浩焉得不為緇芳筵  
坐積思急管夕傷離頃筐堅佳實所願及良時感彼李



下人正冠乃見疑禮義風所敦人事偶乖睽撫樹倚增  
歎中心誰復知

刑部王主事慕嘗有菊一蒂三花尚書僚屬咸  
異之號三台瑞品屬朝之大夫士能文辭者傳  
詠其事至是奎章趙授經以其卷見及為賦五

言一首

西曹應秋商庭戶肅以清金行戒時令嘉菊正羅生台  
精麗前除流耀發華英三萼專夕秀衆芳謝春榮連枝



靡阿比同氣斯合并匪茲恤明刑何以獲休徵願言保  
初服永懷歌德馨

勤耕亭

日月靡閒暇四序

一作時

更運之斯人務作業矧敢怠遑

時負耒適西疇恒患耕作遲仲春時雨至羣物具含姿  
牛食青澗阿鳥鳴芳樹枝興言播嘉穀夙夜將耘耔豈  
不懷逸居亦念寒與饑但使秋稅畢聊樂及吾私義農  
雖已遠沮溺不吾欺努力順時令素餐非所知



右詩為鄒福作也福豐城田家子事藝文揭先生餘力能讀書為聲詩又喜國語習通其學然樸慎不忘乎勤先生甚喜之嘗手書福自為詩七首叙其所從出京師為文詞者福多得其題述是何福之能使人愛若是也學者果皆繫所出乎於是益知藝文為有德矣

寄題奉元張氏望松亭

青松翳高墳重壤閉玄陰孤亭何鬱鬱林氣肅已深白



雲翔其巔悲鳥相與吟佇立以瞻望哀思不能任時祭  
羅豆觴祖考聿來歆歲晏寒風至零露亦在林危柯起  
悽愴令人生悲心逝者已如古來者復為今

清明日遊城西詩并叙

予資嗜幽澹所遇名山水興至輒脩然徑造興盡即  
休無留滯之意客京師三年聞西山之勝未至焉乃  
元統二年二月二十五日為清明節風和景舒卉木  
妍麗金華王叔善父四明俞紹芳同里范誠之與予



從一小蒼頭載酒榼共出遊城西遂至先皇帝所創  
大承天護聖寺縱觀行望壽安香山而還先是約信  
宿徧歷山麓諸寺迺止至是謂三子曰是行適意爾  
即一詣而窮其勝豈更有餘興哉相與登高丘藉草  
而坐酒數行約賦古詩五言六韻五章道所得之趣  
書二十字亂器中人探五字以為韻時誠之止酒予  
又性不飲叔善紹芳脫冠縱酌旁若無人予亦吟嘯  
自若都人士游者車服聲技相闐咽金壺玉槃羅列



照爛意若甚薄余數子者而又有若甚慕者焉既夕  
罷歸所賦詩各繕寫為一卷明日會余于杜氏館中  
夫子在同游間年最少而好任意興三子不以予年  
少而奪之誠之與予俱不舉酒而能從二子之飲不  
厭其醉是遊不已樂哉叙以識之

曜靈動若木晨鳥鳴東窓興言集儔侶西郊出翱翔登

高望荆吳延目極三江密林何蒼葢

或作掩藹

嘉樹翳蒼蒼

感此時節遷慨然思舊邦乘風即清曠薄使我心降



出自城西門，未知道所窮。  
竝驅陟長阜，山川鬱何雄。  
纍纍道邊墳，四顧生悲風。  
茫昧萬物始，晏晏天地終。  
陰陽相推化，焉知搏埴工。  
誰能同朽木，俱盡委蒿蓬。

梵宮何巍巍，白日耀流藻。  
前楹交網樹，陰階被靈草。  
宿昔構華麗，河沙施七寶。  
丹霞通飛閣，清飈激馳道。  
車馬

縱一作從  
音同

橫至虛空，漫漫浩浩飛龍逝。  
不返令人傷懷抱。

游子愛良辰，出門各有攜。  
陽春發惠氣，好鳥鳴喈喈。  
芳

花明曲陌

一作渚

新楊拂大堤，羣物紛相悅。  
斯人多所懷。



飄彼陌上塵化為水底泥百年亮如此不樂復奚為

長風度廣澤清輝汎遙甸曾宮爰崔嵬落景駐遐眷羣  
觀各侈靡金寶列豐膳幽賞聊共娛誰云極遊衍嗟嗟

水中鳬翩翩雲間燕微生亦何勤志足

或作  
七非

非所羨

寄題吳興馬氏清華堂

豐堂翼華構陽景麗前楹曲流相紆帶軒牖一何清微  
波涵素暉嘉卉發丹榮中庭列圖史芝桂亦羅生有酒  
介眉壽內無憂患并朝弄石泉水夕采玄玉英從之不



可得願欲濯塵纓

題淵明漉酒圖

淵明性嗜飲所遇適其真漉酒東籬下邈若旁無人捐

紱非所吝焉愛頭上巾田園日成趣松菊相與親百年

何為爾酩酊及茲

一作此

辰

或作晨非

陶然至和內混沌以為

鄰

送陳助教衆仲赴江淞儒學提舉二首

登高送將歸車馬橫道周白日明大河遠望悵悠悠宿



昔違鄉國慷慨事行游懷寶非固售同氣乃相求茲焉  
去皇邑被命赴南州詵詵胄子徒惻惻不能留逝將敷  
文教邇可被遐俶我無千金贈臨別恒懷愁獨有清商  
曲可以慰

一作  
網繆

秋風吹浮雲鳴鴈復南翔山川

一作  
水

何慘慄草木日夜

黃客游歲云除

直應切  
一作莫

僂俛懷舊鄉君行即吳會執別

此河梁淮泗多奔流雲海浩茫茫靈颺翼飛艫馳景曜  
征裳去途日已遠來會日已長援之不可得躑躅情內



傷

瑞芝曲

并叙

瑞芝曲者為麻陽簿任君作也君掾順元帥間時芝  
產於所寓之地以為瑞圖之以傳四方思州劉文學  
來京師持以示余求詠其事按王充論衡土氣和則  
芝草生又鵠冠子曰王者德盛則芝草生醴泉出然  
則祥瑞之至有以也任君是圖豈私有之哉亦將以  
侈國家之瑞也吾聞古者以君子在位賢人衆多為



國休祥任君繼自今相率其僚為豈弟之政以布天子之德于民則為祥莫大焉草木之瑞云乎哉

聖人運元化和澤被遐方黃靈啟幽秘朱草發嘉

或作佳

祥璿璿晨敷秀藹藹夕含芳慶雲流瑞露丹霞沃天陽  
網緼所凝結玄造亦何常夷居勿云陋斯人樂以康繼  
今崇令德諸福應時昌

題陳氏菊所

陶公逝已遠舉俗慕高情之子厭塵雜開徑挹其清晨



起除翳苗

或作  
稻

種蒔蔽

一作  
蒲

前楹結根固其所獨立誰

為榮中園何荼敷綺席蔭朱甍車馬日自臻絲竹騰妙  
聲凝霜既被野繇露復盈庭百卉豈不佳朝敷夕已零  
東籬信淒索可以托幽貞

題董氏具樂堂

董生築高堂予以養其親溫軒納飛旭涼牖謝流塵大  
椿蔽庭前慈竹映冠巾中厨足甘脆可以奉昏晨有酒  
及嘉賓餘歡洽四鄰生當隆盛時至德復無垠羣動各



蠢蠢靈明貴斯人既復為男子夙夜懷苦辛年命恒

或作

能幾何胡為勞其神所以榮公者樂世乃忘貧矧茲堂

上翁安富殊等倫夫婦齊壽考遐福日以臻有子才且賢有孫復詵詵如何不為樂言笑及良辰好鳥四時鳴佳花萎復新黃髮日娛戲焉知冬與春

### 挽張隱君

栽栽浮柵山鬱鬱彭蠡濱中有隱居者逍遙畢冬春讀書佃城府杖履率耕耘雞黍會田家酒醪合四鄰既醉



亦詠歌富貴如埃塵一朝厭浮世含笑返其真貴賤同  
一盡各為丘與墳所立苟不忘浮榮焉足珍

彭叔璵得杏花一枝歸置小齋同居王叔善甫

邀余同賦杏花曲人一章約五言五韻

朱葩含朝景流芳自中園顏色一何麗

一作媚

灼爍耀樞

或作靈非

軒嘉賓從外來臨賞各欣然同根豈不好異處乃

殊妍貞心諒自知脉脉終不言

題叢蕙



蕙葉何青青羅生被巖隙中庭忽邂逅四顧風蕭蕭含  
翹紛旖旎懷馨潔以脩時俗苟不佩芳草或為茅微物  
恒易遷君子內傷憂願從芝蘭化庶異薰與藉

題草蟲圖

大氣流天地動植紛自形陽卉耀春華陰條敷夕榮昆  
蟲信微細于以托生成守宮夫何慕蠻觸戰奚爭蚩蚩  
伏青藜跂跂緣紫莖促織焉念寒牽牛不事耕蜈蚣性  
含毒多足復能行莊周齊蝶化晉惠昧蟬鳴玄蟬翳高



枝君子慕其清蟾蜍溺所嗜汙穢不能靈感茲動中懷  
變幻焉足憑羣生各有命鴻化亦何情

送張景陽歸覲

鴻鵠懷遠舉騏驥慕高馳志士多慷慨文墨徒相羈挾  
舟行遠遊翩翩至京畿京畿四方會冠珮交陸離紫宮  
承星辰高蓋爰雲霓聖人內垂拱至德徧羣黎求言逮  
微賤一善思罔遺君子道既達胡為忽言歸嚴冬霜霰  
零晨起候鳴雞送者亦在門南望各逶迤願君自貴重



歲寒勿相違

題原闕

太虛憑網緼萬化更往還  
涵生雖異靈緼德諒斯全  
聖人繫周易茲道廓以宣  
鬼神無逃情天地泄幽玄  
稽微內無象舉大窮八埏  
研思何能極精義乃不煩  
來者紛討求窈窕元氣端  
君子依恒運小人昧至言  
憂道不可忘正利非所先  
需進良有時知命復何患

使至真定赴都計事遇大雹傷穀時逆臣唐其



勢誅

午發漳陽城莫投郭村店人烟樹相錯分野昴所占連  
屋臨古塗幽花垂深塹行旅各已息下馬卸征轡形容  
風日槁衣服塵土染倚牀秋蕭蕭汲井月黯黯舍翁得  
客喜亭長見官厭田家始收穫勤苦供稅斂夜來大雨  
電婦子憂食歟還聞公侯家終歲酒肉饜天子今聖明  
誅鋤盡奢僭覆車監前轍焚室戒微燭禍淫良已速福  
善終必驗區區子何人行役奚足念



中山北道傍丘阜

自出城北門平野亘長雲道傍多高阜累累若丘墳豐  
草為不生白日何氤氲焉知非陵墓下有長逝人棺槨  
化為土衣冠腐為塵既往不可見來者不可聞百歲何  
足恃為生良自勤

八月十三日至京

孟秋涼颿至驅車出西門去京始彌月白露忽已繁茲  
行亦何為于役義所敦山川既悠遠晨夕違清溫我馬



北以南豈不慕丘園努力在王事賢勞奚足論

九日夷山驛

馳驅涉長道時節良易更去日能幾何商飈颯以盈玄  
蟬號且息羣鴈翩南征茲辰發重九在俗豈殊情抗袂  
出虛館登高望舊京圓穹無留翳素顯有餘清延矚周  
四遐但見古時城頽宮委蔓草喬岳襲前名茫茫陰陽  
間感此百慮并我性不解飲虛觴聊自傾

使還至長沙侍嚴親及外舅孫公遊



仲春景氣妍卉木具萋萋中園凝芳暉時鳥鳴且啗游  
子遠于役歲晏乃旋歸父母日瞻望親戚久睽違及茲  
時物佳少長翁相宜攜壺出東郭聊以舒永懷鴻鵠隨  
天風焉能忘舊栖王事亦可念勗哉以驅馳願言飲春  
酒各保黃髮期

歌風臺

黔首厭秦暴龍德奮炎劉英雄乘天誅拔劍起相仇天  
風隳陵谷飛雲揚九州天下事既定懷土未遑休置酒



金步四庫全書  
卷二  
宴高臺中厨進庶羞悲歌落林木父老皆涕流功臣日  
薶醢壯士復何求至今豐沛間長顧使人愁故鄉帝所  
愛零落遺舊丘大運各有終聖賢誰能留焉知萬歲後  
魂魄復來遊

雲松巢為鎬益之題

青松矗雲際此有巢居者心清謝秦爵根遠思夏社斤  
斧庶不戕棟梁誰能捨常懷太古世木處人事寡高步  
凌靄黤幽棲據瀟灑星河入戶動霧露當虛瀉重霄紛



相屬九域莽在下磅礴俯大氣微茫見平野飛仙遇相  
即風翮時可把浩浩區中塵流景若馳馬鳳鸞或叢枳  
燕雀乃大厦所以安一枝萬事齊土苴

送范悅古再之江西憲史二首

客行辭國都南望越山河燕趙宛相距吳楚為我家別  
離生永歎送子以長歌長歌懷以慨憂憤一何多大道  
日隳墜逝川無還波浮雲翳中天明月乃為瑕君子燭  
微詞小人祇自阿素心苟不渝非意焉足加嚴霜厲松



拍日出當奈何歲晏將自見慎勿改其柯

疾風暴陵谷所觸為我仇林木無寧枝大江汨其流悄  
悄君子心熒熒增隱憂歲月忽馳邁行道阻且脩白日  
臨九圍環照靡窮陬卞生獻奇璞再刖始見收不有固  
窮節焉能忘怨尤行矣勿重陳居易復何求

送別宋子與

人生若浮雲冉冉各四馳居同桑與梓會合乃在茲華  
月洞靈襟高霞敷麗詞晤言永相好暫失繫懷思矧當



萬里行策馬從此辭舊鄉未同返胡能忘嗟咨仲春景  
氣妍翔鳥悅深枝弭節湘川滢迂轡俯江湄及家洵云  
樂懷土非所期榮名務不朽慎勿棄良時

用謝玄暉入朝曲分韻送馬中丞赴南臺得收  
字就用其體

金陵鬱迢遞行旆曖悠悠蘭臺清露集松庭晴靄收  
白鷺迴脩渚朱鳳矯崇丘離離曳青綬曄曄振彤騶遠  
向芳風散神都旭景浮臨軒結冲想還車寧久留



朝出國南門

朝出國南門北顧望重城紫宮承星辰雙闕岌雲興貴  
賤各有安孰知昔所營天地忽震蕩山川皆沸騰虹霓  
貫白日鳥獸相號鳴達士多憂傷貧夫偷自生佇立何  
長嘆天道安可明

西行出周道

西行出周道歷覽坐平原漚澗何寂寥豐鎬著浮烟二  
公營洛邑王業亦已艱禾黍忽離離麥秀復芊芊不見



舊宮室但感書所言  
嬴氏滅諸侯雄跨六合間  
商君用法令一朝廢  
井田赫赫彼宗周在昔多聖賢  
消歇無復餘何況恃強堅

和周伯溫翰林齋宿

英顥散微飈圓靈夕清穆  
詞林屆嚴祀齋房敞空曲  
臨下赫明明在公誠屬屬  
風條象九奏露樹彰三沐  
書告蠲柔翰陳詩列明燭  
從昏禮既虔迨旦興猶夙  
皇德亮時歆景命恍有僕  
升氣清蕭間奠幣玄纁束  
神休對精



享至和數百祿將事庶無懈來祀永相矚

秋日懷揭翰林二首

涼風吹庭樹天地何蕭索玄蟬寂不鳴羣鳥飛相失寒  
氣日以至誰能無處室驅車望江介道路焉可述河濟  
無安流原野皆蕩潏稷黍寧復遺草木但蒙密虎豹無  
時號蛇龍多夜出對此不能言懷人易成疾

遠行去鄉邑單栖無匹儔黃鵠鳴中天夙昔乖所求東  
西無恒舍南北異遨遊同居更離處誰能心不媿日月



遊無厭弦望疾若流咫尺踰千里翹思若三秋白露淒以  
降寒風忽我道蘭芳委巖谷蔓草靡道周君子多思念  
感物諒懷愁海河豈無梁風波安可由且復加飡飯無  
為增隱憂

送仇繼善歸光州

季秋寒風發時物日淒淒鴻鴈鳴索羣野鳥求其棲寒  
暑不貸人客遊多所懷昔為山上雲今若水中泥曲躬  
徇微祿時俗誰能諧大道良阻脩中路顧低回朝發城



南門日莫淮水西歸哉從吾志貴賤焉可齊

送蕭介石

游子慕名都負志辭草萊驅車望國門宮闕何神哉月  
入軒車動雞鳴閭闔開王侯多宴集弦管切雲哀燕俗  
信豪雄自古皆愛才黃金致賢士賓客四方來俛仰時  
既遷蔓草沒荒臺不見古時人何以舒永懷舍茲復南  
去悵悵不能裁

作悵

冉冉歲將莫寒氣下嚴霜征夫懷往路執手野徬徨草



木既蕭條山川悠且長念子今何嚮言適鄒魯鄉泰山  
鬱崔嵬沂泗浩洋洋自昔生聖人衣冠宿所藏詩書被  
遺俗禮樂未云亡豈不念時命斯道不可忘願求同心  
者攜手與翱翔

題胡氏存菊堂

素商薄庭戶豐草日易萎晨興顧林薄百卉無復遺叢  
菊依前除遲莫獨相宜清飈振綠葉零露發幽姿淹留  
諒有俟暴盛非所期對此時物佳欣然賦新詩嘉賓既



在門有酒復盈卮日莫采其英斟酌及茲時四序委元  
化焉知榮與衰

九日會飲和胡古愚并簡諸公

凜秋肅已至榮木遺故枝蕭蕭鞠在庭汎汎酒盈卮興  
言愛重九良會欣及期飲酒非所性杯至聊共持天地  
畱余閒羲和逝若馳陰陽紛離合變化雜神奇太古不  
可還淳風日已漓佳辰樂清讌言詠竟餘暉微月忽在  
楹驚飈滿裳衣斯興良未極攜手且同歸



題原闕

聖人肇宮室制作配陰陽般輸守規矩經畫故有常營  
構在斯須斤斧若飛揚深林產喬木可以勝棟梁大材  
諒不遺細者各相當青雲爰華廈丹疏通曲房日月齊  
晦朔天地儼圓方茨塋既具周丹堊亦輝煌居處信崇  
高先民不可忘君知太古世巢穴以為堂

和趙德隆秋夕雨

落景翳重城凝陰起初夕蕭條飛雨至散漫輕颺激洒



幌靜彌多喧簷暴復息清商亂急管遙怨生離席游子  
恒念鄉氣淒感時易既興北風歎亦抱南山戚晨雞不  
廢度征鴈無寧翼嚮道乖夙期寸陰違所惜詠歌良可  
興幽懷坐填積

和韓都事秋夜

招搖指西北河漢被天東四節自成歲衰榮焉可同陽  
卉日蕭條陰林不復濃慷慨夜多念太息驚淒風鵬鶚

一作  
巨鵬

蔽中天野草集蜚鴻

即蟻  
錄

羣物各有適焉知心所



從

雪中送宋上舍仲敏歸滑州省親

北風何烈烈雨雪亦霏霏遊子去成均將歸

一作往

古靈

昌詩書豈不樂歲宴懷我鄉我鄉伊可懷父母在中堂  
休告亦有時定省焉可忘浮雲踰大伾白日照宣防子  
行日已至送者各盡觴當歌念遠遊令我愧中腸

寄題番易劉氏靜觀齋

萬化紛往還陰陽相終始人生齊性命誰能獨離此寂



寂山中士冥冥會其旨大窮六合外細攝秋毫裏因茲  
達變化何嘗惑生死林春野花發庭雨流雲起對坐終  
日間悠然閱圖史

菊坡為白公嚴賦

嘉菊生林下含英覆坡陀離離帶長坂冉冉間層阿靈  
飈度鮮蕊濃露濯寒柯靜者愛幽姿對之行且歌朝作  
常不忘夕息以婆娑凜秋薄原野百卉忽已過偉茲霜  
中秀獨立諒殊科始志苟無違芳菲豈在多



四月十四日發京

六龍西北馳羣鳥東南翔感我客游士心神隨飛揚迨  
迨踰大河怱怱越崇岡已驚時序易復念道路長驅車  
出東門浩歌慨以慷燕薊豈不樂吳楚為我鄉父母久  
違侍兄弟不在旁當茲遂歸志聊可慰中腸

劍門圖

險門天下險亦復天下壯崢嶸扼西南氣欲輒萬象石  
壁摩往來風湍束奔放深蟠虛無底峭出日月上二儀



含崎嶇萬古設眺望一夫或當關強敵不敢傍胡為昔  
人國恃此亦傾喪聖朝今無外皇化極浩蕩勢狹秦漢  
爭治同唐虞讓乃知不在險六合德可王前年南中行  
其地少平曠懸車度重隘束馬下疊嶂翻疑蜀道坦劒  
閣固殊狀及此觀畫圖間關愁西向浮雲從中來日莫  
一惆悵

城西墓田

題下或有和  
羅若川韻

世傳神仙壽舉俗爭慕之不見松與喬高墳但累累松



柏蔭路衢行者慘逶遲遙千載心只為後世悲春秋  
更代謝萬化諒如茲自古皆有盡令名百世遺生時不  
努力死後竟何為

送何志友抱琴遠遊

客從東南來辭我將遠征九州何遼邈道路縱復橫商  
飈振長林露氣淒以清感此歲月變念子將何行聞有  
太古琴鼓之南風生一奏天地和再奏萬物成知音亦  
已寡持此感人情願言或作薦宗廟可以備威英



題胡質夫更好山亭

盤盤青山阿萋萋嘉樹林中園誰所治亭榭藹沉沉貞  
松蔭奇石脩竹亂珍禽朝雨濯丹葩春陽敷綠陰游觀  
日成趣巖谷有清音他山豈不好誰能同幽襟矧茲蓄  
靈秀芳氣蔚以深油雲始膚寸可以致甘霖沛然澤羣  
物乃復返高岑始知茲山靜仁者諧夙心即此得逍遙  
浮名何足欽

題胡信夫一川風月亭



斜川多佳山流水會中園華亭鬱深秀卉木茂且蕃  
明月賁林幽清風行樹間流彩散復定微雲中往還幽人  
坐平石日夕觀其瀾素暉迴衣巾爽氣在櫺軒會心時  
自知意得復何言

贈掾著蕭達則

太極函二儀萬象昔未形陰陽倏變化奇耦互相乘羣  
生六合中動作何營營吉凶紛自致憂吝焉所徵天道  
良已微人事豈無恒聖神發著策掾勅見其情大易攄



玄秘至言不可更俗流師異端恠妄昧前經達生乃藉  
古茲義日脩明願言善其用庶以道自成

挽劉雨卿

達人慕高隱乃在北山陞感昔生離亂弱齡已自持在  
世何所營課子以書詩秋桂擢丹葩春蘭敷紫蕤既壽  
亦且康浮名何足羈一朝乘化盡溘然與世辭天地亦  
有終聖賢各如茲生存苟無憾委順復奚疑

玉芝曲為鄧或之作



聖人履昌運至德配方員郁郁休氣翔粲粲靈草鮮英  
雲被素趾甘露洒華顛上有飛鳳凰下有涌醴泉銅池  
詎方秀瑤圃諒齊妍聞昔松與喬采之以得仙願因獻  
天子服食致長年

漢宣帝時金芝九莖產於函德殿  
銅池中芝色如金銅池承露也

### 題顏友立耕樂堂

深居謝輪鞅畢力事田園生世食其勤誰能同久安晨  
興負耒出日夕乃來還時雨集丘隅靈禽鳴樹間桑麻  
蔚一作鬱北牖稼穡藹藹南阡鄰曲多往來斗酒數為歡誦



書不求解契道乃忘言在昔譏素餐畎畝多聖賢簞食  
苟無憂作勞非所歎

琵琶怨

美人揮哀弦上客歎蛾眉急響多悲思孰知心所之感  
者奉綢繆不言生別離誓將桃李顏結君長相思如何  
雙栖翼中路忽乖睽不怨歡會難但恐恩愛虧含情冀  
同顧中曲多苦辭君子苟不聽賤妾欲奚為

團扇辭



團扇昔在時素手不相離涼溫得君意動息亦有儀炎暑良未徂恩愛詎中衰何言遽相失一旦棄如遺舊物諒非貴故心不可移願因新人得持以置君懷

題過氏適安堂

營營俗間務莽莽城中塵疑冰悲夏蟲惡影笑塗人遠者悟茲言思還樂我真生世嗟物役誰能勞其神過足諒非慕為歡聊及辰深居無塵雜豐屋麗且新庭柯集翔鳥池藻散游鱗觀化獲自然戚戚非所遵庶將依仁



宅處樂以終身

題蘇氏耕樂堂

少年思薄宦既老思田里耦耕非吾事素食良所耻時  
雨行東臯平疇被流水興言命童稚東作從茲始飯牛  
桑芋陰秉耒郊原裏舊麥既青青新苗復靡靡升堂舉  
杯酌閒暇閱經史有秋庶可待敦本聊自喜古人不復  
存斯士亦云已食力吾所安夜行貴知止

題王元載御史為潘彥賓作幽人瞻綠圖



曳杖緣芳趾引睇步前林脩篁鬱蔥蒼輝度行袂碧影赴橫琴美色  
露發春姿流雲滋夏陰蒼輝度行袂碧影赴橫琴美色  
非所貴高節良可欽歲月自流邁霜霰日交侵青青乃  
不渝瑟瑟有餘音比物思衡風瞻望意何深爰求詩人  
體實獲君子心永言託嘉喻聊用寫幽襟

徐氏生意亭

芳春會陽景佳氣蔚前楹春澤亦已和時物日滋榮茫  
茫大鈞軸圮缺四時成孰知萬象先甲者悉未萌陰陽



無停化元氣以流行觀茲悟生理人道亦有恒百穀播

始獲

一作獲

太倉積乃盈願言樹豐德奕世永其生

題

原闕

聖人御天下九五應乾元神物何矯矯精氣久乃全屈  
信陰陽際出入有無間風雲一時合雷雨相後先下顧  
周八方上行窮青天流澤無愆候原野以豐年功成不  
自居寂然歸九淵

觀外偈為天寧講主慈公賦



團團虛白室了了圓通士心觀乃非目性定猶止水羣  
動紛自形諸緣遞相倚譬如中堂上坐見前林裏空方  
無定在內外非可擬凡此分別見皆緣識根起微塵含  
空眴玄象標月指應現本無方恒不離所止世人執邪  
見外驚何時已應當離諸相玄悟從此始

題宜春鍾卿清露軒

清卿  
能琴

秋氣集太虛夕光溥高樹時聞陰夜墜暗識商飈度旒  
旒星動林英英月霏霧涼局息塵想幽琴寄玄悟寂歷



松上聲逍遙丘中趣釣天澹斜景銀河暖微素古調今  
所稀太音誰能喻仙人飲沆瀣壽命金石固千歲不可  
期空歌徒延慕

挽談孝子采

采字文卿清江人侍父尹零陵父病  
籲天氣以己年並父壽已而采卒而

父安葬茂  
材鄉常山

白壁傷易毀幽蘭悼先賴陰陽孰吹噓脩短從所制伊  
人邦之秀少小拔其萃孝友積和順辭華著光麗青春  
何忽忽韶景睽云逝愛親希長年保已非素志至今常



山下行客揮涕淚芳風吹  
護草英雲被叢桂去者日以  
長來者日以繼立世務不朽  
生死徒歔歔顏殤易為感  
跖壽何足貴

挽廖節婦

孝子妻

關雎有恒匹別鵲不更雙  
婉婉令母儀煌煌君子堂事  
夫死同穴誰能易其常皋蘭  
殞夕露庭菊厲朝霜芳齡  
誓靡適暮齒終弗忘懿德耀  
高閭清風彌大邦哀榮一朝  
異縞素發道傍虛窓委斷織  
重壤煜幽缸高山上我



金華集卷二  
我流水下湯湯瞻言歌衛風三歎我心降

題柏友亭二首

交道日淪喪結恩不結誠朝為春華發夕已秋葉零薄  
俗傷易遷使我慕清貞深居謝朋游嘉樹旅前庭影直  
靜相偶心通潜有聆霜霰依時至雨露互滋榮下根附  
旁薄上枝拂窈冥興言著歌詠伐木感嚶鳴德義古所  
敦切琢庶相成友已苟無益不如草木生

種木必種堅取友必取端汎友無完節常木有凋殘彬



彬魏亭士古柏意所歡封植嗣前規斧斤違世患衆芳  
或搖落脩榦鬱桓桓舊本亦已固新枝日復蕃夏蔭交  
座隅秋影溢簷間薰濡致馨德採服資妙顏不有後凋  
操誰茲同歲寒

題登瀛洲圖

龍姿御昌厯詞館萃羣賢對問日優暇更番時後先退  
集樂餘閒誰能徒食眠游藝亦云末寓情諒匪專十洲  
不可求瀛海以言傳遂令是中士望者稱若仙丹青孰



是非翰墨互騰宣才難古所歎後者或求全

和虞公同李伯宗賦昱公四珠精舍

泠泠清澗流磊磊碧山岑巖棲遺紛競禪憩悅幽深雨  
過虛室寒寶氣發前林明月交珠柱微風來樂音圓明  
攝諸境空觀明宿一作風心嗟茲遠行客悵望結冲襟

淵明圖

淵明高世姿稟性良寡諧出仕諒云偶忽去亦奚疑人  
生驅衣食微祿恒累之枉已既非志在俗固多違萬鍾



不足顧五斗奚以為卓茲千載中作者與為期

題麋架閣所藏故人新竹圖

叅差蔭竒石磔礪連孤樹初籜既從風新枝復承露  
瞻茲時物化感彼芳辰度故人思久要夙昔垂良晤  
山阮詎非倫求羊諒同趣虛心願自比從今至遲莫

九鷺圖

鮮鮮白鷺羽振振清江漜露草寒已衰風蘆近相蔽  
飛鳴各自適離居亦有次雖愜江海情終懷雲霄志  
君子



思有則畫者工取譬儀羽庶可希脩潔誠所貴

羣鴈圖

微茫洞庭野隱約瀟湘岸鴻鴈將棲息飛鳴求其伴先  
集良未安後至淒欲斷使我懷弟兄因之中腸亂留連  
江海遠慘淡秋暉晏常恐隨天風高飛入雲漢

題素宏泊渚圖

秋氣集空渚月彩汎微波夕坐起遙思中流聞咏歌移  
舟近相卽酌酒望銀河高懷世稀偶良會豈更多未知



百歲下視此復如何

題袁安卧雪圖

積雪既填戶衝風或入衣空廬獨僵卧豈不念寒饑薄  
俗何足干固窮良自為自非洛令賢誰能顧荆扉茲事  
已云往高風今絕稀

刈蘭棘圖

為了上人題

樹蘭勿近棘剪棘或傷蘭惡木剪復生芳草樹不蕃空  
門一諸幻君子殊衆觀薰蕕戒同器玉石忌俱燼不見



致芻人懷馨增永歎

題張仲衍書屋圖

茅屋閉柴荆度橋聞讀書風含萬谷動雲集兩座虛松  
葉走山犬花源通夜漁世俗自多違林泉非見踈他時  
或相憶來就北山居

題雲崖圖

高崖含青空雲氣所出入網緼日千態蘄絕恒特立雨  
合龍挂低風迴鳥飛急寄言為山者進簣屨可及



題張伯龍書屋圖

清江帶茅宇絕壁連松寺溪響漁未歸橋聲客應至數  
鴉林外落一犬庭陰睡終日對羣書焉知俗間事

題墨竹

吾聞崑崙竹可截黃鍾管千尺雲外姿數寸煙中斷時  
人拘兩目所見何自短撫卷方寂寥清風坐來滿

題石榴畫

漢使致石榴千秋見嘉實聚寒瑪瑙破枝重珊瑚屈憶



昔聞大宛疑將薄西日丹青有微喻意豈貴遠物

題山水小景雜畫九首

晴煙翳高樹野水連幽草渾疑輞川業復似斜川島鷺  
下白波閒鶯啼綠陰好安得買田廬相從是中老

空村斷行迹深雪連昏暮慘淡既平岡坡陀復盈路時  
聞一樹折猶見羣鳥去中有映書人柴扉對何處

江白雲稍歸山青樹如沐輕舟漁石渚獨騎經林麓野  
氣昏已明衆聲斷猶續坐憶汎湘時村西見茅屋



雲煙狀幽絕丘壑懷棲遯新雨松樹涼輕飈竹林晚閉  
門堆亂石曳杖行脩坂寂寞垂釣翁扁舟去人遠

雲歸山欲暝月出泉相映石影生夜寒松聲起僧定遙  
疑露下立或發風中詠幽境何間寥長廊罷鐘磬

平湖寫山影遠嶼來花氣魚鳥終日閒琴書有時至風  
檣出彷彿雲水生迢遞對此獨逍遙誰能識幽意

雲山不可極野水多相似古木生夏涼幽篁起秋思漁  
舟石下出歸騎山陰至中有隱君廬蒼茫何處是



盤盤蒼山根泉出如素練含風靜復響觸石驚相濺竹  
迴秋氣來松涼夏陰轉山翁閱妙理獨立無人見

野樹蔭輕舟晴波照層巘平橋昔未斷孤客來何晚坐  
使春思多應懷暮山遠


題墨梅

老樹亞晴空疎花帶寒野風流不自惜澹泊從人寫歲  
晏孰相娛空山少來者

孤花何婉婉玉立含幽素短短時出橋疎疎或臨路坐



疑簷下月半照牆西樹





傅與礪詩集卷二



欽定四庫全書

集部

傅與礪詩集卷三

詳校官編修<sub>臣</sub>曹錫齡

中書<sub>臣</sub>劉源溥覆勘

總校官進士<sub>臣</sub>朱鈐

校對官中書<sub>臣</sub>高 中

謄錄監生<sub>目</sub>施 華



欽定四庫全書

傳與礪詩集卷三

元 傳若金 撰

七言長短句古詩

奉題仇工部壁間古松圖歌

蒼松在山自竒古溝水翳之人不驚忽然圖向堂上壁  
滿坐嘆息長風生交柯盤鬱森晝晦其下將疑鬼神會  
霧雨寒霏虎豹毛雷霆怒坼蛟鼉背乃知巨筆老且神  
力斡造化雄千鈞皇天不矢棟梁具后土潛回霜雪春



爾松已為人愛惜見爾為爾生顏色山中豈無材木  
倚絕壁未逢匠石嗟何益

虞公見之題云絕妙絕妙  
吾人新來第一手由是名

動京  
師

題衛知事廣衍倉西軒墨竹歌

吾聞渭川竹如簣太倉欲致那可得開眼睛烟落戶牖  
透裳冰雪生胸臆愛之借問作者誰毋乃與竹同標格  
自是君懷足清致故須好事留真迹陰森雨氣發中林  
颯爽秋聲起前席微坡直具百畝意老幹真憑萬鈞力



玄豹猶含隱霧章蒼龍已奮千霄翼火雲六月思遠避  
安得坐我林間石待實誰憐彩鳳飢釣鰲未試長竿直  
為君歌罷久歎息羣玉蕭蕭動高壁

百一作千

### 猛虎行

長林瑟瑟多悲風猛獸引子戲林中白晝橫行動山谷  
周遭十里無麋鹿路暗樵夫畏獨歸行人愁向山家宿  
近山日日取牛羊更囓居民橫路傍民要耕田給倉庾  
官家得知射殺汝



寄題岳陽蕭氏四亭

舍南舍北佳山水虛簷黛綠

一作翠黛

浮空起明月秋生坐

榻前白雲暮落屏風裏微茫遠色帶晴湖造物經營趣  
獨殊世上徒傳摩詰畫胸中誰得輞川圖

右天開圖畫

山人住山塵鞅斷草色看見流年換葉落長林鷹過清  
花開雜樹鶯啼亂秋去春來醉復醒常時玄鶴下青冥  
岳陽道士應相過千歲松根煮茯苓

看一作屢  
鷹一作雁



右山間四時

流泉洎洎出地底稍切行雲翻日光環山已歷千峰窈  
到海寧辭百折長波濤日夜相推激戶牖憑高興何極  
風雨冥冥聲合時蛟龍變化那得知

右百川偉觀

長松當簷擁高蓋翠色浮光照庭內天矯聲從霄漢回  
蒼茫氣與風雲會柴扉晝寂思共倚藜杖秋閒知獨對  
辛苦移根待雪霜江頭種柳三年大



右倚雲獨秀

墨蒲桃歌為俞紹芳題

紹芳名述祖  
四明鄞縣人

大宛蒲桃連萬區  
貝丘蒲桃員十大  
宿昔仍聞植漢苑  
見之坐右神森爽  
露餘大實垂堪摘  
烟際危藤引初上  
度海疑從博望槎  
入林恐一作似倚雲霄  
杖流沙飄飄豈

易致一作到

別館蕪廢今誰賞  
蕭蕭素壁走龍須  
風雨蛺

蝶日應長憶作揮毫  
雲正愁炎天忽若對  
清秋玄珠滿

把君能得綠酒千鍾

一作樽

不用求古來豪富誇蓄積肯



貴翰墨相傳留君不見扶風孟氏子笑談一斛買涼州

後漢扶風孟佗以蒲桃酒一斗遺張讓拜涼州刺史

賦得秋夜長送方叔高

秋夜長長如歲長如歲尚可夜涼薄人不能寐羣鴈各南翔一鳬尚北飛團團素明月流光照我衣當歌正激烈慷慨送將歸丈夫成名微亦足焉能終夜悲判促

秋月皎皎夜何長念君客遊思故鄉當壚美人惜年芳

遙一作長

夜起舞歌清商歌清商送急管為君酌美酒請



君勿辭滿夜長迢迢漏未終離思比之何時斷離思長  
夜猶短

渾沌石行

九江方叔高得武侯魚復八陣磧中小石于其處白質而黃章狀若雞子

字曰小渾沌揭藝文  
為作渾沌公傳云

渾沌以來不可數萬八千歲生盤古網緼乃在卷石間  
光恠潜通落星渚來從魚復人盡訝坐念武侯心獨苦  
八陣圖成泣鬼神三江石轉凋寒暑蒼波噴清圓且堅  
雞子結成生理全久當化鳥非為恠大未成羊亦可仙



元氣猶涵太素前英雄事往唯存石天衡

一作衡

地軸今

誰識虹上當疑霧雨寒坐中歛恐風雷黑摩挲直如見  
溟滓位置豈肯同沙礫長路相將拂劍隨天陰勿使精  
靈得

奉題達兼善御史壁間劉伯希所畫古木圖

遠樹含幽姿近樹亦古

一作老

色水傍常

一作長

見畫不得

乃在君家

一有中堂字

之素壁青林寂寞行人窈白澗微茫

斷烟隔入門蕭蕭雲氣生落日便恐歸禽爭耳後颯爽



行

一作發

風聲知君夜眠愁雨黑留客晝坐宜秋清劉侯

學李侯畫手稱獨步

一云畫者劉伯希近此稱絕藝

時見作古松盤屈

百怪聚

一作奇形勢

中林一株直且良安得劉侯寫其趣

一作安得

揮毫縱奇氣

慈烏謠傲烏生子為劉氏子作晉寧劉氏母王

蚤寡育其子成人仕為藝文監莞庫吏得祿以

養其親士大夫皆歌詠之

慈烏慈烏阿母養汝時乃在劉氏庭樹間啁爾烏子尚



乳時安知阿母宛頸獨宿日夜畏汝生憂患喑爾烏母  
自勞苦令汝逸雖有風雨巢壞阿母身蔽覆不使烏子  
寒喑爾烏子身已大高飛入上林苑使阿母端坐身反  
哺者我天子至仁羅網不令及爾身爾一身更得食  
太倉粟阿母與爾朝食粟夕止舍喑彼烏生子何必八  
九雛阿母長飢不知彼烏子處喑爾慈烏爾母子慈且  
孝願爾生子如爾孝爾身何須復憂其後凡今之人各  
各有父母



送鄧朝陽歸赴分寧州杉市巡檢

男兒生當游八區焉能鬱鬱守座隅  
往昔滯留湘中日  
我兄翱翔天子都  
先皇崇文坐垂拱  
平明西閣千官擁  
瓊島稱觴日月閒  
玉階奏賦星辰動  
後來執筆隨天官  
纂述大典垂不刊  
書成入對紫微曙  
宴罷歸辭青瑣寒  
凡今得官二釜足  
惜乘邏騎一作腰弓騎馬南山麓  
我有家書欲寄將  
柴門迴映清江曲

朝陽余同里天歷初至京師嘗因天壽節獻萬歲山



賦後以能書助脩大典當得內郡校官借江西司警  
之職近家故也南山在寧州境脩水之上杉市寧屬  
故及之

送危尊師奉香還龍虎山

蓬萊使人朝帝闕馭風上下何超忽青節春辭霧閣還  
紫簫夜送天香發山上蟠桃應著花五雲何處是仙家  
一作太清家但祈下界多年穀長共羣仙飯熟麻

白紵詞



白苧白白如霜美人玉手親自浣製作春衣宜短長春  
衣成有時遠行歸無期願君著衣重愛惜風塵變白能  
為黑

題太白玩月圖

明月出高樹上懸青天中下有萬頃之澄江揚波汎彩  
清若空江風吹人色淒凜此時對月誰能寢十千斗酒  
何足論舉杯直就花前飲花前飲酒無與儔酒酣意氣  
輕王侯仰招行雲不可得但見月與河漢俱西流仙人



伐桂樹玉女倚瓊樓顧盼整相悅棄去終莫留昨日已  
浩浩來日復悠悠人生如飛光及時不飲空白頭君不  
見月中玉兔擣靈藥不能醫此萬古之間愁何如盡醉  
江石上一作醉卧長不醒天地與我同虛舟長嘯一作兼兼六合間  
浩然何所求

黃鵠山人歌

黃鵠之山仙者所游上有萬里之雲氣下有千古之江流  
日月往來揚光於絕頂崔嵬崒嶺橫高秋山人隱其下



奇氣與等侔時逢王子喬白日相邀留口授長生訣吹  
笙緱嶺頭玉京羣仙朝帝所合沓風雲會龍虎中有一  
人王子徒上帝命之司紫府長跪謝山一作人引之凌

九霞左攀琪樹枝右接蟠桃花逍遙佩明月出入太清

家有時乘獬豸下界觸羣邪帝令司民命禍福無舛差  
坐調陰陽運帝車文昌六星示光華光華燿燿照地維  
鳳凰麒麟班陸離仙人飄翩翠霓旗手把雲裾宴瑤池  
宴瑤池飲綠酒玉童東來獻長壽下顧黃鵠山蒼蒼年



命與之同永久

送奎章閣廣成局副楊元成奉旨之徽州染紙  
因道便過家錢塘二首

新安江水清見底水邊作紙明於水兔舊霜殘曉

一作夜

月空

一作夜月隱

鮫宮練出秋風起五雲高閣染宸章最憶吳

牋照墨光明朝驛使江南去詔許千番貢玉堂

綠槐五月高雲冷行人辭闕瞻鄉井奎璧秋迴帝座深

斗牛夜隔天河永君今

一作今君

銜命出江關却到徽州幾



日還天上應須朝絳節湖邊何得愛青山

憶昔行送雅勃呼正卿

初名雅古登天歷第御筆改雅勃呼

叅書南

歸叅書間居京師行中書調廣西選以為靜江  
同知比上其名中書正奏授高郵時廣西寇盜  
而叅書母老即移家歸武昌待次遂作此奉送  
兼問訊江漢故人

憶昔文皇御天厯知君已是青冥客寶氣經年動斗牛  
璇光徹夜通奎壁比來蹇剝人所歎况復貧病家多厄



一作當路宣  
胎氣斯直

忽聞除書雙及門老親白髮生顏色秦郵

近水足秔稻桂林只今多盜賊待次且食武昌魚携家  
不過湘南驛王祥舊來驅別乘賈誼未久遭前席此時  
父老怨來遲他日攀轅會霑臆騏驎那愁九州大鳳凰  
蚤恨三山隔秋浮江漢雲木清夜過淮河月波白新詩  
屢成知自誦遠道即見何由得黃鶴樓南

一作前

遇故人

因君為致長相憶

立春日對雪

乙亥



帝城東風作春雪千花墮地吹還滅雲氣微分五鳳樓  
日華稍動蒼龍闕天涯對節每思親况復愁中數見春  
坐憶一作急高堂獻生菜朝來說著遠行人

古杉行題陳兵曹所藏李遵道畫靈隱道中二

杉題下一  
有圖字

靈隱道中古杉樹上與雲霧相膠葛一作轆轤李侯一見為

寫真霜雪蕭蕭起毫末此杉蒼茫幾百年鬼物扶持人  
所憐貞心豈容螻蟻蝕老幹或有蛟龍纏山林萬里那



得致見者皆驚棟梁器暗壁尋常度雨聲晴窓彷彿生

秋氣

一作晴軒恍  
惚來秋氣

吾聞大厦衆力持此杉誰能久棄之

君不見道邊不材木擁腫百圍安所施

隴西節婦歌為閭母田氏作

夫汝明客死劍南  
子為帥府經歷

隴西節婦生何苦二十夫亡子方乳琴底愁聞黃鵠音

鏡中畏見青鸞舞自從十八嫁良人年年

一作  
三年

離索怨

征塵葉落啼看隴西月花開

一作  
飛

坐憶劍南春劍南忽

報消息至生死那知蚤相棄寒日秋明化石心悲風夜



落崩城泪誓將埋玉歸同穴終擬遺珠照來世  
萋萋種北堂柏舟渺渺臨東逝于今門戶有光輝  
八十紅顏世所稀郎君佐府紆朱綬年老辭官著綵衣  
當時哀苦痛欲絕晚節尊榮忍能一作更堪說寒織猶殘斷後機  
香中未解來時結人間萬事可勝悲腸斷江波日夜馳  
君不見會稽愚婦輕貧賤不待白頭生別離

奉題陳參議溪山四雅圖

陳公退食一事無開閣

一作閣

示我溪山圖晴林當畫發



烟霧頂刻松陰生坐隅恍聞鳴琴動踈

一作竹

一亭宛

在清溪曲樹下風聲出舸舫石間水影搖棋局隔溪高

空鬱森爽丈人避世嗟長往嗜書無論終日讀愛畫時

更臨風賞可憐九老幽致同欲往從之不可通我貧何

時見此屋悵望林壑生清風

一作豁谷  
來清風

題順元帥府都事楊君昭雪卷後

至大間夷寇野鵲劉弄兵鬼方肆殺斂為民害至白

晝入城登元帥庭大呼狎視鎮兵若無人者時楊君



為幕白府僚發卒捕之獲其渠魁七人賊衆潰走南  
邊以寧事聞會執政有銜元帥者以專制論罪凡在  
府者坐之後八年朝廷亦知其枉命在坐咸復予舊  
官屬關陝之變楊君適居蜀不得通今年始來京師  
因靖州劉從事持其邦人士所送贈文若詩為言狀  
及其為人才能遂共感激作憶昔行一首以贈之

憶昔南夷瞰羅鬼魑魅魍魎何為爾奪馬朝驅大市中  
椎牛夜嘯長林裏公然入城欺守帥况論過邑殘居里



府僚會謀飭將卒殺捕渠魁衆皆靡事聞執政議專制  
忍使羣盜輕過鄙明罰終能達帝聰復官更遣司軍紀  
幕中楊君西蜀彥宿者同患今須起感時每欲淚霑膺  
論事猶聞血生齒寇盜一作賊風烟互騷屑朝廷爵祿思  
任使至尊日夜憂四方安得邊臣盡謀士

用王著作

字骨之

見寄韻奉題其所寓聽竹軒

王家好種青琅玕四壁秋聲生夏寒朝回每獨風前立  
客至時同烟際看北牕數竿最幽勝滿耳蕭蕭客

成作世非



塵淨截管休將學鳳鳴

學一作作

世間古曲無人聽

邯鄲行

邯鄲城頭下白日邯鄲市上風蕭瑟故壘空餘鳥雀悲

荒垣只見狐狸出何王墳墓對山阿尚憶諸侯爭戰多

趙客歸來重毛遂秦軍老去畏廉頗黃塵白草宮前道

鬼火如燈夜相照公子秋來不見歌

一作過

美人月下那

聞笑當時冠蓋激浮雲搗鐘考鼓宴青春只今惟有郵

亭樹還送年年行路人



傷哉行

傷哉何傷哉出門聞天語掩袂不敢哀道傍行者但躑躅使我寸腸為之摧嗚呼上天生下民下民何多灾玉龍駕若木奄忽復西迴吾聞女媧斷鼇立四極胡不使之萬古不動長崔嵬天高蒼蒼不可及下民號之空仰泣

廣西謠

廣西謠一何悲水冷冷山淒淒寧逢猺賊過莫逢官軍



來徭賊尚可死官軍掠我妻與子

八十里山行

桂林之區徭賊雜處南有八十里之高山絕天綿延開

險阻賊人倚之

一作山

作巢砦劫掠經年勢還大官軍收

一作征

捕費供給主將逡巡竟

一作意

何待居民近山晝夜

愁山下行人皆白頭况聞良家半為賊官府貪橫仍誅

求安得大聚邊頭兵甲鑄田器盡鋤高山作平地高山

平徭賊斃



南屯老翁行

南屯老翁年七十官府征徭困供給大男送糧赴軍前  
次男守寨不得眠盜賊時時劫生口東隣西舍日夜走  
今朝喜見朝廷使持酒含悽說前事筋力雖微不敢休  
辛勤更備官軍至教兒應役莫逃亡祝男成長身日強  
但願明年盡殺賊耕種官田得見力

泰宇篇

元氣渾淪物之先至道周流充大圓洪覆六合完以堅



曠劫不壞體自全真人乘清馭紫烟坐攝羣動觀化遷  
手持玉芝授至言恬澹無為遊秦園太虛之室洞玄玄  
絳衣神君宅中間開闔兩扉日月旋列星離離耀樞軒  
玉樞金籥固靈闕物物不干妙自然崇臺中峙朝列仙  
內景含照洞無邊以虛為牖靜為垣子能居之神永安

雲莊行為將作院使約約正德賦

房山山川蓄清美叅錯田廬間流水中有萬頃之白雲  
劃然變化開奇偉紛紛北貫居庸合縹緲西連太行起



映日初緣赤縣來，乘風忽被青冥裏。  
雲莊主人起莊中，亦如雲氣隨天風。  
從龍已取應時運，作雨猶一作尤資成。

歲功一朝進退卓，然異衆人浮沉那得同。  
乃知其善發天性，況復所由承世忠。  
身居富貴心何有，馬上看雲數回首。  
別墅思臨謝傅棋，故園憶對陶公酒。  
朝有舊臣人所賢，即今未得辭歸田。  
頗聞醉後王摩詰，乘興時能畫。

輞川

東溪行為滁州萬戶楊俊卿作



東溪王者楊將軍少年領兵多樹勲心將富貴同流水  
身以承平住白雲聞道雲深是溪處扶桑直對門前路  
青山左抱日光迴寒瀑西連雨聲注將軍臨溪樂詩酒  
沙鷗水鶴相親久螺贏經年綴鼓輦蠨蛸盡日蒙刁斗  
白團羽扇小綸巾閒携棋局過比隣舟中有客時尋戴  
花底逢人非避秦人間何所無丘壑車馬憧憧走城郭  
紅葉空藏秋渚斷綠蘿自傍春巖落近者征南兵未休  
荒村窮谷多罹憂願移部曲隄殘寇却向溪邊娛碧流



送袁慶遠赴潮州經歷

慶遠淦西人號景山

結廬清江山與隣帝里留連冬復春  
南陌花開臨別酒東城柳發送行人  
行人直望潮陽館水驛過家風日暖  
天入滄溟裊纜長路經庾嶺題詩滿  
桑浦人家炊晚烟昌黎祠廟草芊芊  
候吏立當榕樹底丞徒列及荔枝前  
府中文牘紛相積官長權迎幕賓客  
颺母秋還島霧清鱷魚夜徙溪雲黑  
遊子天涯興轉孤明朝相憶定何如  
上林無日無來雁會有鄒人寄帛書



樂城節婦詞

樂城婦郭氏子一生生長閨門底少年嫁夫夫早死牀  
頭明鏡不復治落花深院鳥聲悲昔時山前哭夫處辛  
苦攜持葬姑去一身未亡兒女小兒今長大身益老大  
行行舟河水枯妾心皎皎終不渝縣官旌門人見好死  
生離別那可道

秋夜曲

草木搖落鴈南飛文牕皎潔承月輝淒風入房露沾扉



紅顏含彩垂佩褱簪金鳴玉揚舞衣蘭釭射耀照君幃  
遠行胡為未言歸

七星硯子歌

吾聞飛星墮地時匿彩含光或為石垓凝適與精氣會  
采斲猶疑鬼神惜君家文房七星硯坐令識者嗟難得  
天上還愁失白榆匣中歛見開玄辟尋常傳觀潤生手  
造次何忍汙以墨孤月秋懸列宿稀五雲夜墮三台拆  
新晴試筆當廣庭頃刻烟霧生青冥忽憶前年渡河漢



奉使不識天文經歸來空有支機石長使人間知客星  
送篤敬夫御史之南臺

布衣憂國人共嗤有時沉思坐終日不愁賢才進用盡  
但恐吾道經綸屈忽聞故人拜御史走讀除書百憂失  
文氣寒依北極回德星夜徑中天出故人昔在天厯歲  
憶送君行把君袂瀟湘洞庭霜始清蓬萊弱水風能至  
董生對策遭英主韋相明經起高第丹閣終看集鳳凰  
青雲早見驅騏驎一生忠義心所留身至霜臺仍黑頭



感君氣槩重交分令我懷抱開  
霸愁繡衣南下動江海  
寶劍東行次斗牛吾聞獬豸  
憎魑魅肯使鵩鴞為寇讎

天師張大玄祈雪歌

至元二年冬不雪天子夙夜憂黎民  
宮庭擇日詔方士  
臺觀通天求百神留侯之孫住  
龍虎世領祠官列圭組  
鳬雁經時詣紫微鳳章半夜飛  
玄武皇天愛民祈可必  
臘雪依微應三日望拜還聞在竹宮  
受釐忽報臨宣室  
天地杳默韜玄功賜予紛紜恩賜  
一作數隆請和六氣輔



元化常使九州歌歲豐

銅爵硯歌

鄴中文磚天下奇流傳為硯亦堪悲月砌寒傾古臺莫  
雨犁耕出斷釵時荒涼火燒狐兔窟金棺別葬奸雄骨  
石麟暗刻魏春秋銅爵空題漢年月可憐此硯依浮世  
曾見高筵美人醉行迹猶霑舊鞵塵啼痕已滅新粧淚  
向來登踐日紛紛即會磨洗見奇文題詩為弔西陵樹  
地下曹瞞那得聞



禾簇簇題鄒福所藏勤耕圖

禾簇簇禾簇簇去年缺雨今年足人家耕種少得閒一  
春強半田中宿塘上水生禾欲齊春禽愛近落花啼出  
入無人看門戶野庭一任人來去有時耕罷亦長吟歸  
來不記入村深書編從挂牛角上詩卷閒留桑樹陰田  
家小心畏法令常願秋租得餘剩隣翁昨日到城還聞  
說官家有新政民間禁馬不禁牛有牛耕田君莫愁  
喜有後題羅天則鵲見尾圖云得子識也



喜有後喜有後酌君酒為君壽丹青百年知為誰今人  
不及古人手是誰幻此靈鵲解人意坐令見者嗟神異  
鵲兮鵲兮爾何慧既不學海上精衛禽銜石填海恨海  
深又不學蜀中子規鳥空山夜啼愁達曉梨花亂開春  
日晴喳喳來踏樹枝鳴風裏花開時見尾烟中樹合但  
聞聲深閨少婦聽倍喜却憶春來郎遠行郎遠行兒在  
腹郎歸來兒在目想君得畫歸有期正是閨中聞鵲時

題薩天錫歲寒圖



松樹青冥氣千丈野梅幽竹連蕭爽月下微風縞袂開  
塵前大雨蒼鱗長看君墉壁有此奇君更與此同霜姿  
乍聞清瀨瀉懸石忽若流雲生石陂

烏金子為晁安兒作後母害之劉長道者生之

烏施施尾襪襪生時作巢養子雄樂雌一雌死一雌來  
三雛待母食一雛長獨飢彼母胡不仁子不讎母將奈  
何雛在樹母啄逐雛去樹百鳥利雛肉常恐身斃巢亦  
顛母雖愛二雛巢壞寧獨安忽有黃鵠從東來挾雛置



樹間含哺以食教以言今日羽翼成黃鵠不言恩

武氏節孝篇武用妻蘇氏子名德政

孰不有婦武氏有婦貞且慈夫疾自刳股夫亡守空帷  
志不可奪義不可虧命子有遺言千載為母儀孰不有  
子蘇氏有子孝以順生時養母不違母母沒長思奉遺  
訓負土為墳廣塋域東西築臺高百尺二泉出地蛇所  
導神物冥冥寸心格泉廢尚可發土夷尚可增吁嗟蘇  
氏子同傳身死有名人鮮能



遠將歸

遠將歸恨歸晚通州河頭有船僱行人將歸不言遠人  
家生子少離鄉一生長在父母傍自憐出入無年月北  
走京師南走越他人富貴輕貧賤一日金多棄鄉縣小  
官祿薄何足為得及父母康強時說著還家客心喜此  
身雖貧亦不耻

覆舟歎

吳中富兒揚州客一生射利多金

一作錢

帛去年販茶湓



江東今年載未黃河北遠行香火倚神明從來風水少  
遭驚近日舡行御河裏順流日日南風喜笑人上水風  
打頭豈擬自家船入水前船各自向前行後者還來逢  
哭或作笑聲妻子家中未知死同侶將書報鄉里道傍歎  
者獨何為昨日寧聞今日悲豈不見他平地上風波頃  
刻少人知

書陽羅堡

微雨蕭蕭濕行李馬頭即見長江水烟浦明侵白鳥邊



風帆亂入青天裏故人南北久離居  
況復經年無素書  
明日重吟漢陽樹何須不食武昌魚

雙劍圖歌

莫邪干將古神劍得水化作雙龍翔  
斗間寶氣入江滅  
波裏金鱗翻日光道人筆鋒如劍利  
亦能化龍致神異  
黑風扇扇濤欲立白日陰陰雨將至  
忽然逢之不敢窺  
爪甲雲氣常淋漓便愁中夜雷霆怒  
兩龍乘雲盡飛去

金人擊鞠圖



古來北方善騎射材力往往矜英雄吾觀金人擊鞠圖  
意氣已欲橫土中黃旗鷗羽措天黑繡柱龍鱗掀日紅  
鳴鞭縱轡捷一發左迴右折如旋風流星逆亂拂衣裏  
飛電翕忽生馬鬃極知此藝較輕矯馳騁亦似觀成功  
後來唇齒不自惜縱習武勇終亡國當時得失爭一丸  
百歲安危復何益

題篤御史海鵬圖

空庭海鵬誰所狀海氣初高鵬神王雲脚西騰弱水涯



湖頭東出飛霞上此時扶桑色始分下視百鷺空其羣  
日中金鳥側相避籬下凡禽何足論

醉仙圖

吾聞真人絕嗜欲酒有何好仙好之八人坐飲崖樹下  
沉醉千日無醒時夢中冥冥浩劫始世人不知其所以  
蒼梧洞庭孤月生閭風玄圃羣飈起猿啼鶴翥無聊賴  
顛倒烟霞在冠屨壺中盡是長生日物外無非共游處  
醒時所執醉若遺萬事紛紜何足恃嗚呼仙道或在酒



於我不飲生何有

武夷山雨圖懷杜徵君

武夷山中春浩浩疾風滿地翻  
瑶草雲來九曲川欲平  
雨發千峰樹如掃谷口車輪  
不能辨水邊茆屋終相保  
可憐卿相多黑頭空谷斯人  
著書老

孫伯大山居圖

洞庭之區水所諸波濤四時  
春太虛故人卜築乃厭此  
因遣好事圖山居昨日開圖  
見山色坐中烟雲生頃刻



峭石雄爭華岳青飛湍怒截天河白衡門雞犬仙源裏  
野徑山橋宛相似掃花可以坐白雲採藥誰能記流水  
知君愛山不在山畫者所見非人間竹陰對客自吟嘯  
松下聞泉時往還我生食貧若奔走石田茅屋今安有  
招隱空懷小山桂讀書未種先生柳看君此志真絕塵  
只今功名始發身會須買田增築室遲莫有意來相親

伯大山水圖

齋居胡為見雲壑白日虛嵐滿秋幌何水深蟠地底回



層崖險歷空中上蒼茫不知開闢始咫尺須論數千丈  
林端遠岫微有無巖畔精藍鬱蕭爽雜樹懸羅拂輕黛  
寒松覆谷含清響仙源或在人間世洞口孤舟欲長往  
嗟我生平最漂泊中年萬事何鞅掌憶昨征行多所經  
至今絕境懷幽想雷霆半夜山忽至風雨三春石應長  
對坐聊歌隱士芝無因一試仙人杖

方少府雲山圖

岳陽方君嗜山水妙墨千金不論價好事林生偶相得



乘興能為米家畫雲壑幽森愁翠虛風林颯爽宜朱夏  
石橋對面寒泉落茅屋無人午烟罷知君家居洞庭左  
亦有別築東山下鄉者入侍白鶴宮終日奔隨六龍駕  
谷中白雲晝自滿石上青松歲當化為憐東駕事趨謁  
常擬還山事

一作治

耕稼我亦平生貪勝境誰其未老身

閒暇就君買山安得錢願乞長纒掃嵩華

### 送蒙古學正楊茂先歸

古來篆籀久不作聖代同文變新學近者秦書廢舊傳



諸生漢詁求先覺岳陽官舍冷於秋微祿淹人歲月流  
已聞給告還鄉縣明日風帆失郡樓

題宋道震皇都春色圖

客居栖霞山自號栖霞子平生好詩仍好畫詩興蒼茫  
畫圖裏昨日山中閒酒壺酒酣聽我說皇都坐聞皇都  
好春色引至東家觀古圖東家古圖長一匹數字猶題  
馬麟筆上有宋皇飛白之草書舞鳳回鸞弄一作雲日  
此卷臨摹用心苦猶恨生綃不如古歟從坐上見平蕪



便恐征衫濕微雨雨中如聞人語聲彷彿謂是長安城  
水波已暖浴歸雁宮柳初長啼早鶯閭闔霏微五雲起  
樓臺隱約千花底是中冠蓋多貴人想見行車若流水  
豈無禮樂成教化亦有文章待閒暇山人胡為獨長往  
或問長安指圖畫君不見古來出處稱達生山林朝市  
各有名百年適意無不樂聊醉春風歌太平

題章存誠十二馬圖

韓幹畫馬天下聞筆力遠到曹將軍忽從座右見神駿



落日蕭蕭愁暮雲，雄姿利氣閒且逸。  
霧鬣風髯十二匹，神龍變化未可知。  
天駟光芒有時失，去年刷馬喧都鄙。  
紛紛殺馬輸馬耳，騏驎遙依沙漠寒。  
駑駘盡向江南死，江南近來一匹無。  
君家乃得存此圖，便當持獻穆天子。

上下八駿同馬驅

江南死一作風塵死

題劉煥宗明皇四駿圖

明皇昔時愛名馬，天廐所有皆神龍。  
今君畫圖有四匹，無乃神駿來九重。  
圉人控御愁閭闔，千里長安草蕭颯。



沙苑晝疑雲霧昏，渥洼夜恐風雷合。因思蜀棧鑿輿苦，  
那見唐宮教坊舞。老驥飄搖棄長道，美人寂寞歸黃土。  
開元舊事誰復陳，獨使此馬傳其真。今人觀畫心所忽，  
古者千金市駿骨。

梧皋行為淦張會慶賦

玉山桐林君故鄉，聞有梧樹叅天長。高枝蒼茫會風雨，  
老幹偃蹇殊陰陽。江皋顥氣接翠飛，屋下春泉流細香。  
敬侯種木晚為用，少陵移居恒不忘。只今城中池水側，



還植遺根志先德鸞鳳棲枝漸長翎蛟龍伏竅終生翼  
飛英拂硯春常滿落葉當庭晚逾積避暑時開背日牕  
聽風或坐臨流石蘭臺御史玄圃僊高風勁節時所賢  
直將文章著始末坐使泉石生光妍昨者尋君坐梧下  
為君誦詩神爽然他時清廟製琴瑟君有長材寧棄捐

劉宗海山水歌

吾郡山水邑材藝皆絕倫昔時稚川善游戲妙墨往往  
追前人後之作者非一士劉生妙年下筆新意營慘淡



竊元氣功接虛無通鬼神一生精勤嗜奇古十年不見  
今楚楚忽然遺我四老圖白日雲烟起牕戶頭上松花  
坐處落手中芝草饑時咀此翁眉骨非世人蹤迹何因  
到城府誰依澗石開茅屋亦遣踈花映修竹樵斧時衝  
白鹿歸漁舟獨繫青楓宿嗟余奔走貪長道見畫幽人  
愧塵俗近時詔下徵隱淪茲士胡為置空谷

牧牛去題袁慶遠經歷所藏畫

牧牛去千山復萬山上山日出愁起晚下山日入苦行



難手中鵠鵠牛伴侶養來多日能人語縱牛不牽繩自  
垂聽他行食母苦之欲歸尚憂牛不飽更近前溪多水  
草但願年年牛盡肥主翁足食身足衣農家養牛國所  
賴惡少城中殺牛賣

贈相士潘碧山

安城碧山子所居以色自取夫何如眼同秋水照絕壁  
心與浮雲行翠虛古來善相稱許負子有藏書服膺久  
直言往往驚四坐乃使世人畏其口嗚呼萬物同一氣



妍醜於人豈天意蜂目誰知不可親虎頭自信終能貴  
近者遇子岳陽城知我貧薄謂我清顏回屢空吾豈敢  
猗頓多貲非所榮潘生潘生子非佞我生久已安微命  
君不見松栢空自材歲晏蕭蕭雪霜盛

贈醫士謝茂德

淦江遠近皆名山仙翁羽客多往還玉田輝輝生寶氣  
丹竈徃徃留人間謝君逢之得其道家積羣書日探討  
上池飲水能知物東海得方還却老早時玉桂照庭階



世俗紛華志寡諧  
幾回酒到能傾座  
何處詩成不放懷  
古來醫術資造化  
內足看君貌閒暇  
市上懸壺豈近名  
城中得藥應同價  
種來林杏日青青  
猛虎環行衆不驚  
豈無詔使求弘景  
亦有詞人傳宋清  
近者江城喜邂逅  
人生那得長相就  
丹砂見說可輕身  
遲子南行覓勾漏

題胡志同所藏牧牛圖

志同名秦豫  
章人善書

達官肥馬飽欲死  
農家畜牛恒苦飢  
春田百畝用牛力  
出入飼之須以時  
平林蒼蒼雨如霧  
散牧前坡自知路



今年作苦牛勿辭去歲凶荒闕王賦

題香室僧所藏簡天碧松檜圖

孤松直立苔滿身皮骨老作蒼龍鱗墨池得水怒穿壁  
屋上垂髯寒近人傍有雙檜左紋皺短蛟下蹲不敢伸  
神靈變化或有日雷電時時撼香室

牧牛圖歌

并叙

牧牛圖者袁氏之族送其經歷君赴潮陽而作也圖  
有竹木水草其間一牛食且飽由由然弛其繩以憇



牧者弄禽於其側而各自得焉蓋民之就牧者有類  
是牛善養之而不害焉則可終歲食其力矣經歷君  
既去潮而歸余始獲觀圖於其第且聞潮民多德君  
者圖果有補於是行哉請作歌以題其後後至元四  
年十月某再拜

我生田間食牛力牛為民命古所惜漢相行逢躬自問  
齊王坐見心先感看君此圖誰所畫牛傍牧者何閒暇  
哺禽獨坐芳草中歸遙應過竹林下牛飢或一作食飽



或眠養之勿害天者全服箱可以致遠道力穡由來知  
有年吾問長民如此牧養民得肥國當足君不見去年  
東海頭家家賣刀買黃犢



傅與礪詩集卷三